



“Bakea zuei”

Pastoral Idazkia pandemia dala-eta

Anai-arreba maiteok.

1. “Asteko lehen egun haretan bertan, arratsaldean, ikasleak etxe batean batuta egozan; judu-agintarien bildurrez, ateak itxita eukiezan. Sartu zan Jesus eta, erdian jarrita, agurtu ebazan esanez: «Bakea zuei». Gero eskuak eta saihetsa erakutsi eutsezan. Pozez bete ziran ikasleak Jauna ikustean” (Jn 20, 19-20). Gau baltzean, estutasuna, bildurra eta nahasketa nagusi zirala eta itxaropenaren eta biziaren ateak itxita egozala, Jesus agertu jaken, bere gain hartu dituan gizadiaren zauriak erakutsiz. Geureak, geure gaixoenak, hiltzorian dagozanenak diran bere zauriak erakusten ditu; ateak itxita dagozala gertatzen da, eta egoera horrek askorentzat ziurgabetasun- eta etsipen-iturri dan gaur egungo konfinamendu-egoera dakarsku gogora. Izututa, noraezean, gertaerak ulertu eta kudeatu ezinik dagozan ikasleei, eskuak eta saihetsa erakutsi eta hauxe dinotse: “Bakea zuei”.

2. Une gogor eta latz honeetan, adore eta itxaropenez betetako berbak zuzendu gura deusueguz. Egoera honek giza izaeraren beraren makaltasuna eta, aldi berean, gure gizarte eta ekonomia egituren hauskortasuna agertzera emoten deuskuz. Baina, horrezaz gainera, geldiarazten dabean arazo eta erronkak garaituz eta gaindituz, gizakia zailtasunen aurrean hazi egiten dala eta erabakitasunez bere burua besteen zerbitzura sormen, alkartasun eta sakrifizio handiz eskaintzeko gauza be badala erakusten deusku.

3. Jaungoikoaren Herriko kideok erantzukizun eta itxaropenez geure egin dogu egoera hau; agintari eskudunek agindutako babes-neurriak gauzatu doguz; trankiltasunez hartu doguz onartu behar izan doguzan ezohiko neurriak, besteak beste Eukaristiaren ospakizun publikoetan parte hartzeko ezintasun mingarria, eta eskuzabaltasunez bizi gura dogu danen aldeko maitasuna, hain zuzen be, honetan eta asko emon daikegun gainerako eremuetan erakusten dana: gure inguruko pertsonak, familiak, nagusi eta gaixoak, behartsuak zaindu eta eurei geure burua eskaini. Jainkoaren Hitza arretaz entzun eta bakarka eta familian otoitz eginez, sendo irauten dogu geure bidean, sendotasuna eta eroapena jadesten doguz eta geure baitatik ataraten gara, besteengan pentsatuz eta geure burua zabal-zabal eskainiz. Santuen alkartasunak biziaren ogi eta maitasun eta batasunaren sakramentu dan Eukaristiari – eleizbarruti, parrokia eta alkarteetan ospatzen jarraitzen dogu- lotuta egotea ziurtatzen deusku.

4. Bihotzez eskertu gura dogu abade, diakono, biziera sagaratuko kide eta laikook kristau alkarteetatik egiten diharduzuen guztia fededunek bizi daben egoera gertutik jarraitzeko eta euren beharizan material eta espiritualetan laguntzeko. Horixe da, hain zuzen be, gure eguneroko ardura: eurakaz etenbako hartu-emonean egon, behar daben guztirako prestasuna erakutsi, euren alde otoitz egin eta Eukaristia eskaini, gabeziak antzeman, arintzeko eta ahulenei arreta eskaini. Eskerrik asko zuon emote eskuzabalagaitik. Gorogatu, Kurutzeko San Joane esan ebanez, "maitasunean dabilen arimak ez dau nekatzen, ez da nekatzen eta ez dau atseden hartzen".

5. Pertsona nagusiei eta egoitzetan bizi diranei, eta euron artean, geure abade nagusiei, beren-beregi zuzendu gura gatzakez, adore eta kemenez betetako hitzak bialduz. Ez zaiteze bakarrik sentitu; ez zaiezala bildurrak, estutasunak edo ziurgabetasunezko sentipenak garaitu. Une honetan zailtasunak asko badira be, eta hainbat eremutako mugak nabarmenak, gure eskura dagozan neurri guztiak ipinten dihardugu zuoi ahalik eta arretarik onena eskaintzeko helburuagaz. Zuon biziak gure alde gastatu izana eskertu gura dogu eta orain geure maitasun eta autormena erakutsi gura deusueguz merezi dozuen zainketa eta arreta emonez. Kasu askotan ohiko presentzia fisikoa ezinezkoa bada be, zuon osasuna arriskuan jarri leiken kutsatzeko arriskua dakarrelako, honako honen bidez gure hurkotasuna, babesa eta esker ona adierazo gura deusueguz.

6. Eleizbarrutiko kuriako sail guztiek lanean dihardue, beste bide batzuetatik bada be. Fede-zabalkunde eta katekesirako ordezkariak kristau sarbideko eta eremu desbardineta heziketarako prozesuak aurrera egiteko lagungarri egokiak batzen eta argitaratzen dihardu. Karidade eta zuzentasunerako ordezkariak bere jardura sendotu egin dau Caritasegaz batera pobretasun, makaltasun eta bazterketaz betetako eremu guztietan. Liturgiarako ordezkariak, gure eta gizartearen arteko hurkotasuna areagotzen eginahalak egiten diharduan komunikaziorako sailagaz batera, liturgia ospakizunak etxeetara eroaten ari da.

7. Beste hainbat erakunde eta era bateko eta besteko fededunen alkarte publiko eta pribatu, saiatzen ari da, bakotxa bere ahalmenen arabera, egoera hau arintzen. Eleizbarrutiko Teologia eta Pastoralta Institutuak askotariko lagungarriak eskaintzen ditu heziketa eta espiritualtasunaren arloan; Lagungo familia biderapenerako eleizbarrutiko zentroak, bere aldetik, entzute eta arreta psikologikorako baliabideak jarten ditu behar dabezanen eskura. Eleizbarrutiko ikastetxeek eta BAM Irakasle-eskola unibersitarioak on-line eusten deutse euren jarduerari, ikasleei etenbako arreta eskainiz. Eleizbarrutiko erakunde guztiek egiten dabe euren ekarpena, gainerako sail, alkarte eta erakundeakaz batera, sare sendo eta eraginkorra, gitxienez neurri batean, pandemia honek eragindako atsekabe eta kaltea arintzeko bide dan sarea, eratuz.

8. Aparteko arreta merezi dabe osasun pastoraltzako taldeek eta egunotan, ospitaleetan, egoitzetan zein etxeetan, gaixoei, senideei eta osasun arloko profesionalak arreta eskaintzeko ahalegin guztiak egiten diharduen abadeek. Bereziki, gaixoen oliadura, etenbako otoitza eta hilzorian dagozanen eta hil diranen eta euren familien aldeko arreta, grazia-, kontsolamendu- eta itxaropen-iturri dira eurentzat. Zuok zarie, euren eginkizunean buru-belarri diharduen profesionalakaz batera, zauriak

arindu eta sendatzeko isurtzen dan Kristoren ukendu. Ez dogu autortu barik itzi gura kongregazio erlijiosoen lana, laguntza eraginkorra emoten jarraitzen deutse-eta, bihotzez eta maitasunez, gaixoei, familia txiroetuei, bizilekurik ez daukien pertsonei, baztertuei eta gizartetik kanporatuei.

9. Ez gendukez klausurako monasterioak ahaztu gura; hortxe dago eleizbarrutiaren hauspo espirituala. Euren bizitzaren eskaintzaren bidez, Aitari bere Semearen Gorputzeko zauriak aurkezten deutsez Espiritu Santu kontsolatzaile eta maitasun eta errukiaren iturriak eutsi gaizan une latz honeetan, gure artean senidetasun eta zerbitzuzko hartu-emon barriak sortzen dituan Jainkoaren maitasunaren presentzia izateko.

10. Gure eskerrik beroena osasun arloko profesionalei, boluntarioei, suhiltzaileei, segurtasun-indarrei, zerbitzu publikoei, gaixoen eta euren familien aldeko arretan buru-belarri ari diran pertsona, alkarte eta erakundeei eta, orokorrean, herritar guztiei. Esker ona, baita be, euren politika, ekonomia, enpresa, lan eta gizarte erantzukizunetik, osasun-krisia eta familietan, ekonomian, lanean eta gizartean eragiten dituan ondorioak gainditzten lagunduko deuskuen neurriak hartuz, egoera honi aurre egiten saiatzen ari diranei. Eta gure autormena barri emoteko egitea betetzen ari diran komunikabideei, eta ezinbesteko zerbitzuen horniketa ahalbideratzen daben erakunde eta gizabanako guztiei.

11. Egin daigun otoitz hildakoen alde, santuen alkartasunean eta betiko bizitzan fedea autortuz. Gogorra da gure senide eta lagun maiteak badoazala ikustea, eta gutako bakotzak eta familiak gurako geunken laguntza eta kontsolamendurik ezin deutsegula eskaini sentitzea. Egunero ospatzen dogu Eukaristia hildakoen eta euren senideen alde. Hileta-mezarik antolatzeke aukerarik izan ez badozue be, jakizue geuk ospatzen dogula egunero zuon partez. Jainkoak ez gaitu sekula bertan behera izten. Geure izaera hauskor eta makala bere gain hartu eban Semea bialdu euskun Harengan bizia oparo izan gengian. Dagoeneko osatuta dagozan bere zauriak erakusten dituan Kristoren agerpenak garaitzen dau atea itxita egozan ikasleen bildurra. Zauri horreek begiasteak bakez eta itxaropenez beteten gaitu, ikasleei gertatu jaken lez. Euren gainera putz egin eta unibertsoa barritzen dauan eta gure artean maitasun eta errukian oinarritutako hartu-emon barriak sortzen dituan Espiritu Santua emon eutsen. Ezekielen hazur sikuen irudipenean lez (ik. Ez, 37), pandemiak eragindako egoera suntsitzaile honen ostean, Espirituak sendatu eta bizia sorraraziko dau hondamendia eta negarraren lekuan. Espiritu honek, era misteriotsu baina benetakoan, deialdia egiten deutso Eleizari eta gizadi osoari, giza bizitzaren garapenerako eremu guztiak berreraikitzeke, onbideratzeko eta barritzeko.

12. Esker on berezia, krisialdian, giza eremu oinarritzko eta funtsezko lez agertzen diran familiei, bertan beti aurkitzen dogu-eta aterpea, kontsolamendua eta babesa, besteei bihotz-zabaltasunez zerbitzatzen ikasteko eskola izateaz batera. Osasun-alarma honek gure familietan, gizartean eta ekonomian dituan ondorioak begi-bistan doguz dagoeneko, krisi ekonomiko eta sozial erara, eskuzabaltasunez eta bihotz-zabaltasunez aurre egin beharko deusagun erronka bilakatuta. Pandemia honek gizartean izten ari dan zauri sakonei aurre egin ahal izateke, ezinbestekoa

izango da danon ahalegina, guztion ongizatea lortzeari eta, gizabanako eta familiarik ahulenak lehenetsiz, guztiei laguntzeari begira.

13. Atarian dogu Aste Santua eta, horregaitik, Jaunaren heriotza eta berbikundearen misterioan sakon parte hartzeko prestatu gura dogu geure burua. Geure etxeetan ospatuko dogu, familian batzen dan etxeko Eleiza lez, gure etxeko atearak itxita badagoz be, Jainkoa gure artean agertzen dala, bere eskuak eta saihetsak erakusten deuskuzala eta bere bakea eta Espirituaren doea emoten deuskuzala jakinda. Harek muga guztiak gainditzen ditu eta gure leku eta denporazko baldintzetatik harago jarduten dau. Eleizkizunak komunikabideen bitartez emongo doguz, eta dei egiten deusuegu zuon etxeetatik familian parte hartu daizuen. Bizi daiguzan bihotz-barritze senez, otoitz eginez eta esker onez, geure barruan, gizadia osoa barritzen dauan eta gu guztiok, egoera mingarri honetatik biztuz, sakon barrituko gaituan Kristoren pazko-misterioan birsortuz. Krisma-mezan, krisma santua eta olioak sagaratuko doguz; baina abade-agintzarien barritzea Jesukristo Abade Nagusi eta Betikoaren egunera atzeratuko dogu. Indarrean dagozan murrizketak aldatu ahala, egokitu egin beharko doguz eleizbarrutiko, parroketako eta alkarteetako Pazko aldiko liturgia ospakizunak.

14. Anai-arreba maiteok. Jaso eizue gure miresmen eta esker ona zuon ahalegin eta iraunkortasunagaitik. Dei egiten deusuegu eta adore emoten, pazientziaz eta sendotasunez aurrera egin daizuen. Ez daigula etsi besteen aldeko jarrera arduratsuan eta etenbako zerbitzuan. Kristo hil eta berbiktuaren presentziak bultzatu gaizala egunero geure burua emoten, ilusinoz eta sormenez, itxaropen-ereile izanez, Jainkoaren bihotzaren araberako senide gizadiaren eraikuntzan danen zerbitzari lez jardunez. Maria Birjinak bere ama maitasunez lagun egin deigula eta eutsi gaizala egiteko honetan. Bihotzez.

Bilbao, 2020.eko martxoaren 29a
Garizuma aldiko V. Domeka

+ Mario Izeta Gabikagoxeaskoa
Bilboko Gotzaina

+ Joseba Segura Etxezarraga
Bilboko Gotzain Laguntzailea